




N*ahanungod* *sa* **ARMADONG** **PAGPANGHILABOT** sang mga tropang Amerikano sa Pilipinas

Ginpreparar sang Kawanihan sa Impormasyon • Partido Komunista ng Pilipinas



1 ANO ANG BALIKATAN?

Ang Balikatan ang programa sang gintingob nga “paghanas militar” nga tuigan nga ginahiwat sang mga hangaway nga armado sang Pilipinas kag US. Ginalunsar ini suno sa Mutual Defense Treaty sang 1951 (MDT) kag nakabalayon sa pagpamatuk sa ginatawag nga “mga pangguwa nga paandam”. Temporaryo nga nauntat ang paglunsar sang Balikatan sadtong 1992-98 sang ginsikway ang Military Bases Agreement. Liwat nga nalunsar na lamang ini sadtong 1999 sang maapruha ang Visiting Forces Agreement (VFA).

Tubtob sa 1999, naglikaw ang US kag reaksiyunaryo nga gubyerno sa igtalupangod sang publiko paagi sa paglunsar sang hipos, gagmayan kag malip-ot nga paghanas. Sadtong 2000, ginlunsar ang daku nga paghanas nga ginpartisiparan sang 2,393 soldadong Pilipino kag 2,380 soldadong Amerikano. Ginhiwat ini sa mga prubinsya sang Tarlac, Nueva Ecija, Pampanga, Zambales, Bataan, Cavite kag Palawan.

Permi ginsambit sadto sang gubyernong Estrada nga ang paghanas batuk sa paandam halin sa guwa sang pungsod. Pero ginlunsar ini sa mga lugar nga ginabilang nga “kritikal” ukon “delikado”. Pagkamatuod, nakasentro ang paghanas sa mga operasyong kontra-gerilya.

May ara nga mga programang pareho sang Balikatan nga magkatingob nga ginhiwat sang US sa 150 pungsod sa bilog nga kalibutan. Madamo diri, sa aktwal, mga direktang operasyong militar sang mga pwersa nga US kontra sa mga internal nga kaaway sang ginapaglunsaran sang mga “paghanas”, pareho sang mga “paghanas” nga ginhiwat sa nagligad sa Haiti, Honduras, Panama, El Salvador,

Argentina, Turkey, Somalia, Sri Lanka, Bangladesh, Indonesia, Madagascar, Fiji, Equatorial Guinea kag, sa subong, sa Columbia kag Pilipinas.

2 ANO ANG BALIKATAN 02-1?

Ang Balikatan 02-1 isa ka operasyong militar nga ginahiwat sang gintingob nga pwersa sang AFP kag USAF agud lagson ang buyong nga hubon nga Abu Sayyaf. Samtang ginapilit sang rehimeng Macapagal-Arroyo nga isa ini nga “paghanas”, sa mata sang US, maathag nga ini isa ka opensibong operasyong ara sa balayon sang “gyerang kontra-terorismo” sang US kag ikaduhang mayor nga proyektong militar sang US kasunod sang gyera sa Afghanistan. Suno sa *charge d'affaires* sang embahada sang US nga si Robert Fitts, pinakatuyuan sang Balikatan nga ubuson ang Abu Sayyaf kag “terorismo” sa pungsod.



Pormal nga gin-abrehan ang Balikatan 02-1 sadtong Enero 31, 2002, pero aktwal ini nga nag-umpisa sadtong Pebrero 13, matapos maipinal kag mapirmahan ang Terms of Reference (ToR) ukon mga solundan sini. Partisipante diri ang 660 soldadong Amerikano kag 3,800 soldadong Pilipino. Sa 660 soldadong Amerikano, 160 mga katapu sang US Special Operations Forces (mga pwersa sang US para sa mga ispesyal nga operasyon, nga mas kilala bilang “Green Berets”) samtang ang 500 mga tropang pangsuporta.

3 PAANO NATUHAY ANG BALIKATAN 02-1 SA NAGLIGAD NGA MGA PAGHANAS-MILITAR?

Tuyo nga natuhay ang Balikatan 02-1 sa mga nahaunang paghanas-militar. Ginapakita sang mga pagkatuhay nga ini ang matuod nga kinaiya kag katuyuan sini:


a) Sa nagligad, nakasentro ang mga paghanas militar sa pagpaayo sang mga taktika, koordinasyon kag maniobra kontra sa paandam kuno halin sa komun nga kaaway kag halin sa guwa sang pungsod. Ang Balikatan 02-1 partikular nga nakasentro sa pagpusa sa isa ka paandam halin sa sulod sang pungsod, sa porma sang isa ka gamay nga hubon nga buyong sa Basilan, nga gindeklara nga target sang “gyerang kontra-terorista” sang US.

b) Sa nagligad, pakuno-kuno lamang ang mga inaway (“mock battles”) kag teoretikal ang target sang mga paghanas militar. Sa Balikatan 02-1, igasugbo ang mga “magahanas” sa tunga mismo sang larangan sang inaway, magagamit sang mga matuod nga bala nga pagadun-an sa mga buhi nga target.

k) Magadugay ang Balikatan 02-1 sang anum ka bulan, tigaylo sang apat ka semana, nga amo ang kalabaon sang mga nagligad nga mga paghanas. Luwas diri, may isugpon pa nga 15 Balikatan nga pagahiwatan sa tuig nga ini.

Ang Balikatan 02-1 ang kauna-unahan man nga pagkation nga igadeploy ang mga soldadong Amerikano sa larangan sang inaway sa Pilipinas halin sadtong Ikaduhang Inaway nga Pangkalibutan. Ini man ang pinakadaku nga deployment sang mga soldadong Amerikano sa isa ka larangan sang inaway kasunod sang gyera sang US kag UK sa Afghanistan.

4 ANO ANG KAPUSLANAN SANG GINPIRMAHAN NGA TERMS OF REFERENCE?



Ginapabugal ni Macapagal-Arroyo ang pagpirma sang US kag Pilipinas sa ToR nga magaunod sang mga solundan sang Balikatan 02-1 agud matatap kuno ang pungsudnon nga soberanya kag malikawan ang mabaskog nga pagpakamalaut sang mga patriyotiko kag militanteng pwersa kag pumuluyo. Napakamasako ang mga upisyal sang gubyerno sa

pagbilog kag pagpino sang ToR, pero sa katapusan wala ini serbi kon indi dekorasyon. Bangud samtang “ginkilala” sang US ang “awtoridad” sang AFP sa Balikatan, ang matuod nga kumand sa mga tropang Amerikano magapabilin sa kamot sang mga upisyal sang US Armed Forces. Sa kinagguwaan, pagtatap pa gihapon sa interes sang US, labi sa ano pa man, ang ginhatagan nga kaseguruhan sa ToR.

Tanda sang pagpakanubo sang US sa ToR, isa ka gamay nga upisyal lamang nga (si Robert Fitts, *charge d’affaires* sang embahada sang US sa Pilipinas) ang ginpapirma sini diri. Napaslawan ang gusto tani ni Macapagal-Arroyo nga pirmahan ini ni US Secretary of State Colin Powell kag ni Vice-President Teofisto Guingona sang Pilipinas. Tigaylo, ginpapirma na lamang ang ToR kay Assistance Foreign Secretary for American Affairs Minerva Falcon.

Sa pihak sang pagtinguha nga itago sang ToR, ginapamatud-an sang pila ka probisyon sini ang tuyo sang Balikatan 02-1 ang pagpartisipar sang mga tropang Amerikano sa mga operasyong militar kontra sa Abu Sayyaf. Ginadalasa sang mga madason nga probisyon sini ang pungsudnon nga soberanya sang Pilipinas:

1) Section A.6 (kinaiya sang “paghanas”): “mutwal nga pagpanglaygay, pagbinuligay kag paghanas nga kontra-terorista kadungan sang pagtinguha sang Pilipinas kontra sa ASG (Abu Sayyaf Group), kag pagahiwaton sa isla sang Basilan”.

2) Section A.6-7 (tatlo ka bahin sang “paghanas”): “Ang 160 tropang US nga organisado sa tig-12 katawo nga Special Forces Teams igadeploy kaupod ang mga AFP *field commanders* (mga kumander sa larangan sang inaway)” sa Basilan agud lagson ang Abu Sayyaf kag “magapabilin, kon maaprubahan, sa Company Tactical Headquarters” (nga amo ang pinakabasehan nga sentro sang *tactical command* ukon gilayon nga kumand pang-operasyon); paghiwat sang “dugang nga pagpanglaygay, pagbulig kag paghanas sa Malagutay kag Zamboanga” kag “mga suportang aktibidad sa Cebu” (nga partisipahan sang 500 pa nga pwersa nga US);

3) Section a.4 (iya-iya kumand):



“Magapabilin ang kumand sang mga yunit kumander sang AFP kag USAF sa ila-ila nga pwersa” (basehan sa halambalan sang kumand ang yunit kumand, dekorasyon lamang kag indi na esensyal ang gindugang nga “ang paghanas gintingob nga igapatuman sang RP kag US *co-instructors* sa idalum sang awtoridad sang hepe sang estado mayor, AFP”);

4) Section a.8 (rason nga magpalupok): Ang mga pwersa nga US “may kinamatarung sa pagpangapin-sa-kaugalingon” (masangkad ang depinisyon sang militar sang US sa “pagpangapin-sa-kaugalingon” kag sakop sini ang “aktibo nga depensa” ukon “pangpugong nga depensa”; ano pa man, ang aktwal nga pagpasulod kag paglunsar sang gintingob nga mga operasyong militar sa mga lugar nga ginapugaran kag ginahulagan sang Abu Sayyaf wala iban kon indi imbitasyon nga mapalupukan—kag magpalupok).

Sa nagligad, wala sang *joint chain of command* nga ginataha ang mga tropang Amerikano. Nagalunsar sila sang mga unilateral nga operasyon sa idalum sang kaugalingon nga kumand, upod ang kaugalingon nga pagpalupad sang mga eroplanong panggyera, lapas mangin sa mga solundan sang VFA kag iban pa nga kasugot. Sa pagsuma, pinakagamhanan para sa mga tropang Amerikano ang *mission order* halin sa pinakamatag-as nga kumand sang USAF.

Wala sa teksto sang ToR ang mas mga malahalhon nga halambalan –pareho sang pagdumili nga palaparon ang operasyong militar kontra sa BHB kag MILF. Nakabutang na lamang kuno ini sa rekord sang sinapol sang 10 minutong pag-estoryahanay sa telepono nanday US Assistant State Secretary James Kelly kag Vice President Teofisto Guingona.

5 ANO ANG ADYENDA SANG US SA LIKOD SANG BALIKATAN 02-1?

Ang planong tayuyon nga madamuan nga pagdeploy sang mga tropang Amerikano—pagbase na sa Pilipinas, kon pagasumahon—kag ang bug-os kag direkta nga pagpanghilabot sang US mangin sa mga pangsulod nga halambalan sang pungsod, ang matuod nga ara sa likod sang Balikatan 02-1 kag mga masunod pa nga Balikatan.

Bahin ini sang programang “foreign internal defense” sang US, ang pangunahon nga katungdanan sang US Special Forces, nga kapirmihan ginapaagi sa programang Joint Cooperative Exercises Training (JCET). Gintumod ang katungdanan nga ini sa Doctrine for Special Forces Operations: “pag-organisar, paghanas, paglaygay kag pagbulig” sa mga pwersa nga militar sang iban nga pungsod “agud mapahilway kag maproteksyunan ang interes sini halin sa subersyon, kawad-an-pag-luntad sang layi kag insureksyon” kag nagaunod sang tatlo ka sangkap: “indi-direkta nga suporta”, “direkta nga suportang indi-pangkombat” kag “operasyong kombatan”. Plano sang imperyalismong US para sa programa sang “foreign internal defense” sini sa Pilipinas nga direkta nga atubangon man ang Bagong Hukbong Bayan kag Moro Islamic Liberation Front.

Bahin man ini sang pagpatuman sang estratehikong plano sang US sadto pang 1995 para sa masangkad nga pagdeploy sang militar sini sa Asia-Pacific. Base sa natungdan nga plano, may katuyuan ang US nga permanenteng magdeploy sang mas ukon menos 100,000 tropang Amerikano sa Asia-Pacific. Sa subong, may ara nga 88,150 tropang Amerikano nga ara sa mga base militar sang US sa Japan kag South Korea kag sa 7th Fleet sang US Pacific Command. Matapos isikway ang kasugot sa mga base militar sadtong 1991, ginagamit sang US ang lain-lain nga pamaagi kag rason agud padayon nga magamit ang Pilipinas bilang base para sa mga operasyon kag iban pa nga kinahanglanon nga militar sini.

Ang natungdan nga pagdeploy kag pagbase sang pwersa sa Pilipinas bahin sang tum-ok subong sang imperyalismong US sa pagdeploy kag pagpabakod sang “forward stationed and deployed forces”, “for-



ward deterrence forces” kag “forward combat and expeditionary forces” sang US sa lain-lain nga pungsod sa kalibutan, labina sa diin may mga paandam sa interes sang US. Kadungan sini ang pagtukod sang pinakamadamo nga base sa

lain-lain nga pungsod sa kalibutan, sa porma man sang mga baseng may permanenteng imprastruktura ukon mga kasugot para sa “access rights” (kinamatarung nga magsulod kag magtener). Ang pag-

agom sang “access rights” ang pamaagi nga ginahimo sang US agud makapagpasulod pa gihapon sang kaugalingon nga mga tropa sa mga kahimtangan nga wala ini nga permanenteng base militar sa kasugot nga pungsod.

Ang madamuan nga pagtukod subong sang US sang madamo nga bag-o nga base militar sa lain-lain nga pungsod ginasakay sang US sa “gyerang wala dulunan” kontra sa mga “terorista” diin man nga bahin sang kalibutan nga ara sila. Kadungan sang gyera nga agresyon sini sa Afghanistan, nakapatindog ang US sang bag-o nga permanente kag indi permanenteng mga base militar sa Uzbekistan, Tajikistan, Kyrgyzstan, Pakistan kag India.

6 ANO ANG JOINT COOPERATIVE EXERCISES TRAINING?

Ang programang Joint Cooperative Exercises Training (JCET) ginlunsar sang US agud pahugton ang mga relasyong militar-sa-militar sa mga neokolonya kag alyado sini matapos ang Cold War. Nangin yabi nga instrumento ini sang US sa paghanas, paghurma kag pagsuporta sa mga papet kag kaalyadong armado nga pwersa kag sa pagpasulod ukon pagpalusot sang mga US Special Forces (pareho sang Green Berets, Delta Force, Navy SEALs kag iban pa) sa mga papet kag alyadong pungsod, upod na ang Pilipinas. Nagdungan kag nagbulos ang paglarga sini sa daku nga pagbuhin sang US sang sibilyan nga ayudang pinansyal kag pag-atras sang mga permanenteng base militar sa madamo nga pungsod. Ini man ang nangin pangunahon nga instrumento sa pagpalapta sang agresibo kag militaristang polisa nga pangluwas sang US kag pagpatuman sang “foreign internal defense” sang US sa lain-lain nga lugar sa kalibutan.

Madamo nga nabuyagyag kag natalalupangdan nga kaso sang paglapas sang JCET kag US Special Forces sa kinamatarung nga pangtawo kag iban pa nga interes sang pumuluyo sa mga pungsod nga ginpaghiwatan nila sang mga paghanas kag operasyon. Pero indi ginimbistigahan sang Pentagon ukon sang Kongreso kag mangin sang Presidente sang US ang mga ini, kay ginalayi sa US sadtong 1991 ang paglibre sa US Special Forces sa rebyu kag madamo nga tipo sang restriksyon halin Kongreso kag bisan White House.

7 ANO ANG GINHIMO NGA REORYENTASYON SANG PAGPANGDEPLOY SANG MGA TROPANG AMERIKANO?

Pagkatapos sang atake sa New York sadtong Setyembre 11, naghimo ang US sang reoryentasyon sang pangkalibutanon nga deployment pangmilitar sini. Sa Setyembre 2001 Quadrennial Defense Review (pagtasa sang depensa kada apat ka tuig) sang US, gintumod nga yabi nga mga punto sa reoryentasyon ang pagpabaskog sang “forward stationed and deployed forces” (mga pwersa nga nakaistasyon kag nakadeploy sa mga base sa guwa sang US ukon sa diin ara ukon pinakamalapit nga kaaway) sang US. Ginbayaan ang daan nga oryentasyon sang mga ini nga pagdepensa kontra sa paandam sang Unyon Sobyet. Suno sa bag-o nga oryentasyong nakasentro sa gilayon nga pag-atubang kag paglagas sa lain-lain nga paandam sa interes sang US sa diin mismo nagahalin ang mga ini, kinahanglan magdeploy kag magpabaskog ang US sang “forward



deterrence forces” (mga pwersa nga pang-udlot sa mga paandam sang kaaway) agud maunahan ang natumod nga mga paandam. Kadungan man sini ang pagdeploy kag pagpabakud sang “forward combat and expeditionary forces” (mga pwersa nga pangkombat kag pang-ekspedisyon sa iban nga pungsod) nga madasig nga makahulag kag makapaudlot sa ano man nga paandam kag makasugpo sa ano man nga atake sang kaaway diinman nga bahin sang kalibutan. Nakapasulod

sa bag-o nga oryentasyong ini ang pagpanghilabot subong sang mga tropang Amerikano kag direkta nga pagpartisipar nila sa “gyerang kontra-terorista” sa Pilipinas.

8 PAANONG GINATAGAN-RASON SANG IMPERYALIS- MONG US ANG PANIBAG-O NGA ARMADO NGA INTERBENSYON SINI SA PILIPINAS?

Sining Enero 31, aroganteng nagdeklara si US President Bush nga “kon indi sila (iban nga pungsod) maghulag (kontra sa “terorismo”),

Amerika ang maghulag”. Nagpaandam man siya sang gyera kontra sa North Korea, Iraq kag Iran (nga gintawag niyang “Axis of Evil” ukon sentro sang kalainan), mga pungsod nga may rekord sang pagpamatuk sa US kag pagbato sa pag-imponer sang imperyalistang pagginahum sa ila.

Gusto sang US nga gamiton ang buylo sang gyerang agresyon sini sa Afghanistan agud makapaglunsar sang “gyerang wala dulunan” kontra sa mga “terorista” kag dulaon ang mga upang kag paandam sa pagpadayon kag pagpalapad pa sang hegemonya kag monopolyo kapitalistang interes sini. Ginahimuslan sini ang sitwasyon agud wala pagtahud nga dalasaon ang soberanya kag pagkinaugalingon sang mga pungsod kag mga solundan sang mga relasyong internasyunal sa idalum sang mga pangkalibutanon nga kasugtan. Todong ginagamit sang US ang imperyalistang pagginahum sini sa larangan sang ekonomiya, pulitika kag militar agud pwersahon ang “pagbulig” sang lain-lain nga pungsod sa paglunsar sini sang gyerang agresyon kag pagpalapad sini sa lain-lain nga parte sang kalibutan, sang lain-lain nga porma sang armado nga interbensyon.

Sa Pilipinas, ginasangalan sang imperyalismong US ang malapad nga kaakig sang pumuluyo sa buyong nga hubon nga Abu Sayyaf kag pagkahuluya sa pagkainutil sang AFP, agud palaparon ang target sang mga operasyong militar sang mga tropang Amerikano kag tagaan-rason ang armado nga pagpanghilabot kag agresibong pagpanagil-ot sang imperyalistang pagginahum kag interes bilang nagasolo nga *superpower* sa lain-lain nga pungsod sang kalibutan.

9 ANU-ANO ANG GINHIMO NGA MGA PAGPAMILIT SANG REHIMENG MACAPAGAL-ARROYO AGUD LIBUTAN ANG ILIGALIDAD SANG ARMADO NGA PAG- PANGHILABOT SANG MGA SOLDADONG AMERIKANO?

Ginapilit sang rehimen bilang basehan sang Balikatan ang MDT kag VFA, pero mangin sa mga kasugot nga ini wala sang nakabutang nga pwede ukon magpartisipar man lamang sa mga operasyong kombatan ang mga soldadong Amerikano samtang ara sa sulod sang pungsod. Bisan sa desisyon sang Korte Suprema nga nagsuporta sa

VFA, ginbolubanta nga ang temporaryo nga pag-untat sang mga tropang Amerikano para sa pagpahuway ukon paghanas madugay lamang sang mas ukon menos apat ka semana. Indi man sini ginapasugtan nga magpalupok ang mga dumuluong nga tropa bisan palukpan sila sang komun nga kaaway sang AFP kag USAF.



Mangin sa balayon sang reaksyunaryo nga konstitusyon kag mga layi, direkta nga ilegal ang armado nga pagpanghilabot sang US kag, kaangot sini, ang Balikatan 02-1. Ginadilian sa konstitusyon sang reaksyunaryo nga gubyerno ang mga dumuluong nga base militar, tropa ukon pasilidad sa sulod sang pungsod, luwas na lamang nga kon nakapaidalum ini sa isa ka kasugtan nga ginaprubahan sang senado.

Sang nagbisita si Macapagal-Arroyo sadtong Oktubre-Nobyembre 2001 sa US, likom nila nga ginkasugtan ni Bush ang armado nga interbensyon sang mga tropang Amerikano sa pungsod sa porma sang serye sang mga Balikatan. Bag-o sini (sadtong Setyembre 2001), may pila ka pagmiting kag pagpreparar para diri sa tunga sang Department of Defense sang Pilipinas kag sang Asia-Pacific Command sang US Armed Forces.

Agud ipilit ang ligal nga basehan sang Balikatan 02-1, base sa kasugot nila ni Bush, gintinguhaan sang rehimen nga ilusot ang Mutual Logistics Support Agreement (MLSA), isa ka kasugot nga ginhayuan nila nga “arrangement” (aregluhan) sa tunga na lamang sang mga departamento sa depensa kag armado nga pwersa sang US kag Pilipinas agud likawan nga mag-agi pa ini sa ratipikasyon sang Senado sang Pilipinas. Ginpirmahan ini nanday Gen. Diomedio Villanueva bilang hepe sang estado mayor sang AFP kag Adm. Dennis Blair bilang puno nga kumander sang USAF Pacific Command.

Sa aktwal, bag-o nga ngalan lamang ini sang Acquisition and Cross Servicing Agreement (ACSA) nga gin-umpisahan nga iplatar sadtong 1992 pero wala makalusot-lusot sang US kag mga nagligad nga papet nga rehimen sa Senado sang Pilipinas bangud sa protesta sang pumuluyo kag oposisyon.

Sa idalum sang MLSA, ginahatagan sang gubyerno sang Pilipinas

ang pwersa nga militar sang US sang “access rights” ukon kinamatarung nga maggamit sang ano man nga pasilidad, diinman nga parte sa Pilipinas, ano man nga oras kag ano man kadugay. Kon pagasumahon, ginatagaan-hilway sini ang mga tropang militar sang US nga himuon nga isa ka daku nga base militar ang bilog nga Pilipinas.

Tubtob sa ulihi nga tinion, ginatago sang Malakanyang ang MLSA. Pero bangud sa grabe nga pagpakamalaut kag protesta sang pumuluyo kag mangin sang pila sa reaksyunaryo nga oposisyon, napilitan ang rehimeng ipagguwa ini pero siniling “borador” lamang ang nagalapta nga pirmadong dokumento. Sa subong sadto, indi magamit sang rehimen ang natungdan nga kasugot agud pagguwaon lehitimo ang pagsulod sang mga dumuluong nga tropa sa pungsod kag naobliga ini nga mag-imbento sang kon anu-anong iban pa nga ligal nga palusot.

Bruskong ginayaguta ni Macapagal-Arroyo ang mga nagapamatuk sa Balikatan 02-1. Ilog-ilog sa iya imperyalistang amo nga nagtungang sa kalibutan sa tunga sang mga maka-terorista kag mga kontra sa terorismo, gintawag ni Macapagal-Arroyo ang mga “indi-Pilipino”,



“tagapagpangapin sang mga terorista, kasosyo sa negosyo sang mga manogpatay-tawo, kag kahagugma sang Abu Sayyaf” ang mga nagapamatuk sa Balikatan 02-1. Pagkamatuod, siya ini nga sangkuan nga maka-imperyalistang US kag traidor sa pumuluyo nga Pilipino, kag nagatakop sa mga matag-as nga upisyal sang AFP nga protektor sang Abu Sayyaf, kahimbon kag

kasosyo sini sa ransom sang mga *hostage* kag nagapalusot diri halin sa pagkaapike kag pagkalutos. Bangud sa mga nahaunang pagpamatuk ni Vice President kag Department of Foreign Affairs Guingona sa Balikatan 02-1, ginkuhaan man siya ni Macapagal-Arroyo sang pagginahum sa mga halambalan kaangot sang presensya kag kondukta sang mga tropang Amerikano sa pungsod.

10 ANO ANG IMPLIKASYON SANG BALIKATAN 02-1 KAG SANG “GYERANG WALA DULUNAN” SANG US SA SOBERANYA KAG SEGURIDAD SANG PUNGSOD?

Ang paghiwat sang Balikatan 02-1 direkta nga pagtapak sa soberanya sang Pilipinas. Ang pagsakdag sang rehimeng Macapagal-Arroyo sa armado nga pagpanghilabot sang imperyalismong US sa pungsod sa rason nga solbaron sini ang problema sa Abu Sayyaf bug-os nga pag-ampo sa kinamatarung sang pungsod nga Pilipinas sa pagdesisyon-sa-kaugalingon kag kaugalingon nga pagsolbar sang mga pangsulod nga halambalan. Tigaylo nga mangin pangunahon nga prinsipyo ang pagsakdag sang pungsudnon nga interes sang Pilipinas, ginasakdag subong bilang pundamental nga polisa ang pagsakdag sa “gyera nga kontra-terorismo” nga nagahigot sang kamot sang Pilipinas sa “gyerang wala dulunan” kag mga polisa nga ginainponer sang US.

Gintumod sa ToR nga ang Balikatan 02-1 may kahilabtan sa pagtinguha sang gubyerno sang Pilipinas kontra sa Abu Sayyaf. Bisan man, nagapaandam ini sang mas malapad kag mas malala nga armado nga pagpanghilabot sang imperyalismong US sa pungsod labi pa kag ginkabig sang US bilang “terorista” ang rebolusyonaryo nga armado nga kahublagan nga ginapamunuan sang PKP. Nasambit na man ni Defense Secretary Angelo Reyes nga ginaplano nila nga isunod ang pag-atubang sang mga armado nga pwera sa US sa Bagong Hukbong Bayan matapos nila nga maurot ang Abu Sayyaf.

11 ANO ANG MGA IMPLIKASYON SINI SA REBOLUSYONARYO NGA KAHUBLAGAN?

Ang armado nga interbensyon sang US sa Pilipinas magaangkon sang madalum kag pangmalawigan nga mga implikasyon sa rebolusyonaryo nga kahublagan, sa kahimtangan kag mga katungdanan sini :

a. Ang armado nga pagpanghilabot sang imperyalismo nga US sa pungsod nagbutang sang daku nga upang sa pagpadayon sang



estoryahanay nga pangkalinungan sa tunga sang NDFP kag GRP, nga tayuyon na man nga ginaupangan sang rehimeng Macapagal-Arroyo halin pa sadtong tunga-tunga sang 2001. Bangud sa direkta nga pagmulay sang rehimen sa pungsudnon nga soberanya, seryosong ginakunsidera sang Pungsudnon nga Konseho sang NDFP kon mapuslanon pa nga ipadayon ang pagpakig-estoryahanay sa rehimen. Mas malala pa nga pagmulay sa pungsudnon nga soberanya ang Balikatan 02-1 kag mga kadungan sini nga mga polisa kag tikang sang rehimeng Macapagal-Arroyo sangsa sa VFA, nga amo ang ginabasehan sini kag nanging

kabangdanan sang pag-atras sang NDFP sa estoryahanay nga pangkalinungan sadtong 1999.

b. Ang malala pa nga implikasyon sang Balikatan 02-1 ang paandam sini sa mas dalagkuan kag mas malala pa nga armado nga agresyon sang US, sa diin indi na ang Abu Sayyaf kon indi ang BHB kag rebolusyonaryo nga kahublagan ang pangunahon nga target. Ang halambalan sang Abu Sayyaf ginarasan lamang sang imperyalismong US kag papet nga rehimeng Macapagal-Arroyo agud mabalik ang mga tropang Amerikano agud

direkta nga magbulig sa pagpamatuk sa nagalapad kag nagabaskog nga armado nga rebolusyon sa pungsod.

k. Ang direktang armado nga interbensyon sang US sa Pilipinas nagahatag kaathagan sa nagapadayon nga imperyalistang dominasyon sang US sa Pilipinas. Ang paglupok subong sang isyu sang Balikatan 02-1 maayo nga kahigayunan agud matagaan-sikad ang kampanya nga masa kag kampanya nga edukasyon-propaganda tungod sa halambalan nga ini




kag mapasaka ang kontra-imperyalistang kamuklatan kag pagpamatuk sang pumuluyo, maikumbina ini sa pagpamatuk nila sa iban pa nga basehan nga kabangdanan sang ila kaimulon kag kapiguson, maipreparar sila sa mas mga matag-as pa nga lebel sang paghimakas kag madala sa larangan sang rebolusyonaryo nga pagbato. Nagahatag man ini sang kahimtangan para sa pagpalapad kag pagpataas sang nagahiliugyon nga prente sa lebel sang kontra-imperyalista. Bisan ang reaksiyunaryo nga nagahari nga sahi indi lubos nga nagahiliusa sa pag-atubang sa direktang interbensyon sang mga tropang Amerikano sa Pilipinas.

12 PAANO PAGABATUAN ANG ARMADO NGA PAGPANGHILABOT SANG US?

Suno sa Komiteng Tagpatuman sang Komite Sentral sang Partido:

“Indi pwede pahugon sang mga paandam sang mga imperyalista, reaksiyunaryo kag militarista ang Partido kag rebolusyonaryo nga kahublagan. Bunga sang madinalag-on nga pagkakumpleto sang Ikaduhang Dungganon nga Kahublagan sa Pagpanadlong, ang Partido kag rebolusyonaryo nga kahublagan mas mabaskog, mas malig-on kag mas maathag nga nakahangup sa mga katungdanan kag mga kinahanglanan sang pag-abanse sang demokratiko nga rebolusyon nga banwa batuk sa mga lokal kag dumuluong nga kaaway. Hugot nga nagahiliusa ang bilog nga Partido kag determinado ini nga pamunuan ang pumuluyo sa ubos-masarangan nga pagpamatuk sa armado nga pagpanghilabot kag paandam sang armado nga agresyon sang imperyalismong US. Natilawan kag panday sa kapin 30 tuig sang kabuhi-kag-kamatayon nga paghimakas ang Bagong Hukbong Bayan.”

Ginplatar sang KTKS ang hugot nga mga katungdanan sang Partido kag rebolusyonaryo nga kahublagan para sa tayuyon kag ubos-masarangan nga



pagpamatuk sa armado nga pagpanghilabot sang US sa pungsod:

1) Gilayon nga hatagan tum-ok ang pagpalapad kag pagpasingki sang kahublagan nga protesta kag kahublagan nga propaganda. Malaparan nga pukawon kag pahulagon ang masa sang pumuluyo agud pakamalauton, pamatukan kag batuan ang armado nga panghilabot kag paandam sang armado nga agresyon sang US.

2) Ibuyagyag, batuan kag ihamulag ang papet kag reaksyunaryo nga rehimeng Macapagal-Arroyo. Ikonsentra ang pinakamabaskog nga bunal kay Macapagal-Arroyo kag mga militarista sa pagpanguna ni Angelo Reyes bangud sa ila direkta nga pagkapapet kag pagtraidor sa pungsod kag bilang pinakamasupog nga mga elemento sang reaksyunaryo nga pulitika.

3) Palaparon kag pabaskugon ang nagahiliugyon nga prenteng kontra-imperyalista. Aktibo nga makipag-angtanay kag makipagbuligan sa mga pwersa kag elemento nga nagasakdag sa lain-lain nga lebel sang kontra-imperyalismo kag nagapangapin sa pungsudnon nga soberanya kag pagkinaugalingon. Magbilog sang pinakamalapad nga posible nga alyansa batuk sa imperyalistang pagpanghilabot kag agresyon.

4) Pasingkion ang rebolusyonaryo nga armado nga paghimakas sa bilog nga kapuluan. Pabayaron sang daku ang mga reaksyunaryo, labi nga pabaskugon ang armado nga rebolusyonaryo nga kahublagan, ganyaton kag suportahan ang lain-lain nga porma sang pagbato, kag ipreparar ang pamensaron kag organisasyon sang masa kag rebolusyonaryo nga kahublagan para sa maid-id nga paghimakas sa imperyalistang agresyon.

5) Palaparon kag padalumon ang kahublagan nga likom sa kasyudaran kag kaumhan. Seryosohon ang paandam sang imperyalistang agresyon samtang ubos-masarangan nga ginapamatukan kag ginaupangan ini sa lain-lain nga pamaagi nga ligal kag iligal, armado kag indi-armado.

6) Palaparon kag pabaskugon ang suportang internasyunal batuk sa imperyalistang pagpanghilabot kag paandam sang agresyon.